

欽定大清會典事例

欽定大清會典事例卷一千一百四十五

八旗都統

公式

關支俸餉

旌表

出入符信

關支俸餉○康熙元年奏准八旗俸餉冊每季以上月初十日送戶部逾限者造冊官題參交部議處○三十九年議准八旗官兵俸餉按限造冊送部轉劄該庫該倉屆期赴領馬銀亦照此辦理統於歲終彙繕黃冊奏銷○四十四年覆准本年八旗秋季應支給兵丁米石照例於八月全數支給嗣後每年分作三次關支自二

月至九月支給二次。十月至正月支給一次。○
六十年。戶部以諸王及官員等應領秋季俸銀
照例具奏奉

旨。今值動用錢糧之際。即如莊親王貝勒盧克都等並
不行走。此等人之俸銀應行停止。再王以下官員有
不行走者。俱著查明停其俸銀。止給米石。欽此。遵
旨議定。凡一切應食半俸之人。俱行停止。止給米石一
半。○雍正二年

諭。驍騎校護軍校雖係官員。實與兵丁無異。伊等於通
倉支領米石。其所用車價較多。嗣後驍騎校護軍校

等俱著於京倉支領米石。○又奏准八旗年幼未上朝官員之半俸及養贍寡婦終身之半俸已故官員之命婦期年半俸俱仍照舊例給予。○又奏准八旗各佐領下支領銀米檔冊務將各佐領下實在兵丁額數填寫如有挑補入別佐領下者其應領銀米即歸入現補之佐領冊內咨部支領。○三年

諭支放八旗兵丁米石原有定限現今雨水稍多恐車輜難行著展限一月嗣後支放兵丁米石如遇雨水多時即令展限一月將此永著為令傳知八旗及倉

場衙門。○四年

諭。今年直隸地方雨水過多。以致禾稼歉收。所恃者河南山東之穀。今值種麥之時。其收穫與否尚未可知。河南山東雖有穀米。亦暫且存貯。不肯糶賣。因此京師米價騰貴。是以朕將三月應領米石。令其於二月支放。現今已經開倉。但因米價騰貴。八旗兵丁冀得高價。將米不行留餘。盡皆糶賣。於第三季領米之前。必至乏食。其時又行倍價糶買。兵丁人等何以為生。現今麥之收穫與否尚未可知。而秋糧之必得安可恃乎。此等俱係爾八旗大臣等之專責。理宜留心。爾

交倉。此項領出之米。因復行交倉。往往稽延時日。串通倉內人等。誑稱收存。嗣後將應行扣存俸米兵糧。除知會咨文豫至者。將米照舊扣存外。其已經支領者。移咨戶部照漕糧折價之例。老米稜米每石一兩四錢。小米每石一兩二錢。移咨該旗照領出米數。折銀交部。○七年奉

旨。八旗官員俸米。一佐領給予一票。按票支放。兵丁仍照舊例支放。○八年奏准。八旗各設左右司。銀庫令右司辦理。○又

諭。八旗都統等。並不留心事務。將襲職及補授佐領事

件。務必遲至歲底始行。懇忙具奏。朕於年前封印之後。作速補放數旗。於年後開印之先。又速行補授數旗者。特施恩欲令伊等得春秋之俸耳。近聞得一旗有與新補佐領行俸。而不與世職行俸者。亦有一旗與佐領及世職俱各行俸者。亦有將佐領及世職俱不准行俸者。朕屢曾降旨。令八旗將事件畫一。而此一事尚如此辦理。著八旗大臣等會同將各管旗分如何辦理之處。查明具奏。欽此。遵。

旨。將各旗新補佐領世職已未得俸者。查明具奏。奉旨。朕令將八旗事件畫一。屢曾降有訓旨。今新補官員

等俸祿一事。並不詳議畫一。乃致有參差不齊之處。夫支領俸餉。係八旗大臣等所辦之要務。今所奏如此參差。朕將如何辦理。著八旗大臣等會同將某旗所辦為是。某旗所辦不是之處議定。令各旗大臣等自行陳奏。欽此。遵

旨議定。嗣後每年二月俸祿檔案。於開印之初咨部。八月俸祿檔案。於七月初五日以前咨部。紅檔既過之後。仍照舊例不准增減。再襲職官員引見之後。其俸祿檔案。俟該部覆奏行文到日。視其所裁之職行俸。如部文未到。仍照所襲之職行俸。

以後再照所裁之職行俸○又

諭代通奏稱八旗年未及歲未經上朝之佐領世職官員等所領全俸半俸不一等語。朕從前曾降諭旨。凡八旗事務俱令畫一。而此項俸祿為何又令參差至此。著穆森伊禮布祖秉衡將八旗不行畫一緣由查奏。及如何令其畫一之處亦著議奏。欽此。遵

旨議定。嗣後八旗年未及歲未曾上朝之佐領世職官員。照雍正二年副都統馬奇達奏准之例支給半俸。其兼佐領之世職視其官之大者給予半俸。○十二年議准八旗文武各官於俸冊過部

之後休致身故者。不行裁扣。革職者裁扣。○又奏准。支放八旗俸餉。令參領佐領驍騎校會同庫官秤兌收領。領回。即由該參領佐領驍騎校等監視散給。○又奏准。八旗休致身故官員未完罰俸銀。免其追繳。如世爵及休致有俸者。不在此例。○十三年奉

旨。裁八旗左右二司銀庫。令印房參領管理。○又議准。八旗外任官調補京職。於俸冊過部後回京者。該員原俸已經離任截止。又不得造入旗冊支領。與在京升補之官殊不畫一。嗣後此等人員。

如遇俸冊過部之後該旗將其原任職銜造冊送部○乾隆元年

諭八旗護軍校驍騎校等多由兵丁拔補原係微末之員遇有罰俸者每月扣除一半支領一半俾伊等稍資用度以示朕體恤旗員之至意○又奏准八旗俸冊過部後新補官員如係閒散人無原俸原餉可支又在春秋二季孟月三十日以前奉

旨補授者准其具冊補領緣事開復官亦照此例行○二年

諭八旗護軍校驍騎校等原係食俸之人因欲令伊等

用度從容。故將俸改餉。而遇閏之年。不得與兵丁一例支領閏餉。用度未免拮据。著於本年為始。凡遇閏月。照兵丁例支給閏餉。○又覆准八旗兵米定為四季支領。於二五八十一等月放給。○又議准各旗支領俸銀俸米。定有成限。如造冊內有數目舛錯。駁回改正者。未免稽延時日。應令戶部傳該旗承辦之官。赴部與該司官公同改正。該司官即具稿備劄。令該旗員領回鈐印。限三日內送部。劄庫支領。○又奏准八旗關領俸餉各冊。無論有無駁改。俸冊總以六月十二月之十五

日。餉冊以每月之十五日為過部定限。其官兵升轉在限前者。准支新任俸餉。在限後者。不准。告休身故在限後者。准其支領。在限前者。裁扣。各倉米以每季孟月初一日為限。如官兵降革在限前者。追繳。限後者。免追。其或不遵例按月報部。及送冊逾限者。承辦官叅處。○又奏准。在京八旗世爵俸米。向係造入旗冊關支。嗣後世爵任外省文職者。除職任俸銀若干。行文任所支領外。其餘銀米。均留京支領。其世爵之俸與外俸相等。或外浮於內者。均令在任所支領。俸

米仍全數留京支領。○又議准八旗選補

盛京官員。有父母年老。或家口不能攜往任所。願將俸祿留於

京師以資養贍者。令該旗覈實出具印結咨部。准其將銀米一併留京支領。○四年覆准八旗世爵任各省武職者。其俸銀俸米照乾隆二年世爵為外省文職例。將職任應得之數。在外省支領。其餘銀米留京支領。○六年議准各省駐防驍騎校每年應支俸銀俱照在京八旗之例。按月隨同兵餉一體開領。○十三年議准八旗設

立銀庫一應官銀由該參領佐領呈報都統等
暫存旗庫。委參領專管。撥兵輪班看守。其應交
部庫者。該都統分案具批。委官詳解。並造具印
簿二本。以記出納細數。遇該參領接任時。盤查
交代。如有侵挪等弊。由該都統叅追。○十七年
諭。向來八旗兵米。皆按四季支放。但放完之後。去下次
放米之期尚遠。鋪戶得以乘機囤積米價日昂。若將
兵米陸續支放。未免紛繁。其應如何酌分旗色按月
輪放之處。妥議具奏。欽此。遵

旨議定。鑲黃正黃二旗兵米。於正四七十月支放。正白

正紅鑲白三旗兵米。於二五八十一月支放。鑲紅。正藍。鑲藍三旗兵米。於三六九十二月支放。○十八年定。閒散覺羅有隨任子弟。年至十八歲。係在

陵寢地方及

盛京者。准其在京支領銀米。若隨任各省者。均停支。俟回京後。報明旗部。按數補給。○二十九年。奏准各部院筆帖式。遇有罰俸之事。均照護軍校驍騎校之例。每月坐扣一半。仍支領一半。○又覆准八旗兵丁餉銀。每月搭放錢文。無論二

成三成。俱於初一初二等日一齊搭放。○三十二年議准。八旗養育兵應支三色米石。全行支給。稜米。於每年二月內作為一季開支。儻有不能親往支領者。該佐領派領催代關。照數交付。如私賣給錢。將領催治罪。該管官議處。○四十年

諭。八旗兵丁甲米。閏月例不支放。向雖曾特恩賞給。並非常例。第念京師五方積聚。食指浩繁。兵丁所得甲米。糗餉自給之餘。或將賸米出糶。尚可潤及閭閻。數十萬戶仰資其利。現在正逢閏月。例無應放之米。兵

民口食。未免拮据。著加恩賞給閏月甲米。即於本月十五日開放。其十一十二兩月放米之期。並著移於每月十五日開放。明歲新正以後仍循其舊。則禦冬度歲。更得饒裕。嗣後凡遇閏月。俱照此一體賞給甲米。俾各永霑實惠。著為令。○四十二年議准。向例八旗官員等支領俸米。俱由各該旗參領佐領下造具清冊咨部關支。惟漢缺官員支領俸米。乃各由本衙門造冊支領。而八旗漢軍雖有補授漢缺之人。其俸米則仍皆由本旗造冊支領。嗣後除補授漢缺之漢軍照舊辦理外。所有鑒儀

衛衙門之漢缺各官。暨漢侍衛等應得俸米。亦俱令由八旗支領。○四十三年奏准。火器營官兵支領米石。照健銳營之例。由八旗滿洲蒙古旗分辦理。○又奏准。八旗關支閏月米石檔冊。定於前一月十五日過部。至閏月初一日割倉開放。若八旗四季甲米檔冊。仍按各旗過檔定限辦理。如新挑兵丁。及食周年半餉之孀婦人等。在米檔過部定限以前者。准其支領。在過檔定限以後者。不准支領。○四十九年議准。八旗武職。有前議降級罰俸。後將加級紀錄送部抵

銷時值關支俸銀檔冊過部。而所議降罰應否
准抵尚未題准者。將其俸銀照案暫停關支。如
准其抵銷。俟奉

旨後再行補領。○五十一年

諭。凡在京文武官員有降級革職留任者。止將俸銀分
別停減。其應得俸米俱准其照原品支領。以示體恤。
臣工祿以養廉之意。○五十六年奏准。八旗前鋒校
親軍校。護軍校。驍騎校等應領俸銀。俱造入兵
丁錢糧冊內按月支領。如遇閏月一體支給。○
五十七年議准。八旗京察人員。有於春季領俸

檔冊過部以後。開放以前。題准休致降調者。其原領俸祿。候秋季裁汰。春季業已入檔。銀米仍照舊支領。○五十九年議准。八旗馬銀馬錢檔冊。於上月十八日過部。其馬豆檔冊。於上月月底送部。其回園回廠各項馬匹。將回京時。先造約略大數過檔。收回後。再將應添應減各數。及何月日交差出京各日期報部。儻有無故遲延者。承辦官叅處。○嘉慶六年

諭。嗣後。開領俸米。如逾定限。不獨將該員應領米石照例扣留存倉。並當治以遲延之罪。欽此。遵

旨議定。支放俸米。春季自二月起。秋季自八月起。旗員限六十日。漢員限四十日。按限放完。逾限不完。監督並監放官一併議處。如領米官無故違限。將應領米石停給。仍分別議處。○七年

諭。向來在京文武官員遇有降級革職留任處分。將應得俸銀分別停減。其俸米仍准支領。至

陵寢及盛京各員。嗣後如有降革留任處分。准照在京文武官員之例。分別支食。以昭平允。○九年

諭。八旗兵丁月支錢糧。藉資當差養贍之用。若任令在佐領家包封散給。恐難免剋減情弊。嗣後各該旗每

月領出餉銀。著該管都統副都統飭令各佐領等包封。持赴本旗衙署。該都統等親行抽驗。發交該參領按名散給。如有短尅等弊。即著據實叅辦。其內務府兵丁錢糧。亦著照此辦理。○十六年

諭。我朝自開國以來。額設八旗甲兵。按月支給銀米兩項。該甲兵等總應將銀米實領到家。節儉用度。其所領米石。如有數餘。亦當存貯。常令充歲。即或自行售賣。增補家計。亦屬例所不禁。乃近日旗人不善謀生。該管王大臣全不以國事為要。旅進旅退。漠不關心。任聽旗人率先豫借米鋪錢文。至領米時。則由領催

串通鋪戶彙總代領。剋扣折算。及至甲兵等食米缺乏。又轉向鋪戶按市價買用。以國家惠養旗人米石。聽其賤賣於前。貴買於後。輾轉折耗。無怪生計日形窮蹙。各領催分管甲兵各戶內有不能零星赴倉關支者。浼其代為彙總領出之後。自應按名發給。何得從中私相勾串。網利分肥。嗣後著交八旗都統等嚴飭該管參領佐領等。於兵丁支領甲米時。認真稽察。務俾各兵丁等將所領米石。均得全數領回。以資口食。並嚴查各領催如有前項情弊。嚴行懲處。○十八

年奉

旨。向來西北兩路參贊領隊辦事。各大臣帶有京職者。於例支養廉鹽菜等項銀兩外。仍兼領京職廉俸。嗣後伊犁將軍兼京職者。亦著照參贊以下各大臣之例。一體兼支。○道光四年奏准。嗣後在京文武旗員兵丁。拜唐阿等呈請告假。如有逾限。照例扣裁俸餉。以歸畫一。而符定例。○六年

諭。向來八旗兵丁每月關領餉銀。係該管都統等親行抽驗。故給。現在各旗辦理未能畫一。嗣後各該旗每月領放餉銀。著該管都統副都統一員親赴衙署抽驗。後由該參領發給各佐領。按名散放。毋任冒領。剋

扣如值關放之期該旗都統副都統內無人親到抽驗著查旗御史據實叅奏○十四年

諭嗣後遇開放甲米之日於黎明開倉時先將於某日某時刻開倉門之處再將本日放米確數並該旗領米章京等何時刻到倉米石何時刻放竣一併片行稽查御史查覈以專責成各該旗領米務須及早到倉領米後迅即按時陸續進城夏秋閒開放城外各倉甲米太平倉萬安西倉進東直門萬安東倉儲濟倉裕豐倉仍進崇文門○十八年

諭昨據宗人府議奏王公哈喇阿名數章程當經降旨

纂入則例。永遠遵行。茲據奏各該王公門上佐領內。現有充當護衛典儀護軍校及親軍弓匠。滿洲蒙古漢軍。互相食餉之人。若隨伊等佐領撤出。該旗並無可補之缺。著准其將本身一人暫留該門上。及身而止。其暫留各項人等。著先行咨明各該旗知照。戶兵二部。將來出缺時。亦著咨明歸併本旗照例辦理。○二十三年議定。各旗營支領兵餉。向用庫平。嗣後改用二兩平。較庫平每兩少銀六分。積少成多。仍為兵餉之用。王貝勒貝子公滿漢大臣文武職官世職等官。應領俸銀養廉。並一切由部

庫領項。除蒙古王公俸銀等項外。其餘皆用二兩平支放。每年約共節省銀六十餘萬兩。令該庫三箇月一次奏明。仍為俸餉之用。年終彙總報部察覈。至平飯規銀。亦今年終將樽節確數具奏歸款。○又議定。八旗文武職官紅白事賞銀。每年約需銀二萬餘兩。兵丁賞銀。約需銀十二三萬兩。嗣後官員紅白事賞銀各減一半。兵丁紅白事賞銀各減二成。○又議定。武職官員隨甲餉銀。每年約需十萬餘兩。除八旗佐領三旗包衣等應得隨甲。係於額設馬步甲內撥給。

外。其餘自領侍衛內大臣起。每月隨甲餉銀米折銀及米石暫減一半。○又議定馬銀一項。每年約需馬乾銀四十四萬餘兩。亦令暫減一半充補兵餉。○又議定官房租庫應放本款五萬生息項下。除月放給二十四旗公費外。積有贏餘。茲自五月起。八旗滿洲每月加給公費制錢五串。蒙古二串。漢軍三串。前鋒護軍十營。每營每月准領公費六串。以資領餉車費等項之用。○咸豐十年奏。部庫存銀短絀。擬將兵餉變通辦理。奉

諭十月兵餉即照現定新章開放。○同治元年奏准嗣

後京倉應放八旗俸米。各按冊開旗分次序分
定日期。每旗滿洲及包衣定限五日。蒙古限二
日。漢軍限三日。再留二日為本旗餘限。其餘三
旗以次遞推。俟各旗正餘限俱滿後。仍扣足兩
月。作為公共餘限。限滿不領。即行咨部註銷。儻
實有事故。未及按日來領。准於本旗餘限內報
明遲誤緣由。仍按各固山次序補領。加具本佐
領圖結。據實聲明。總不得逾六十日之限。以符
定制。並由各旗揀派章京數員。於本固山領米

之日。照料彈壓。○二年奏准。各旗應領甲米。由參佐領派驍騎校等官。前往兵丁家。却食。取具該兵丁甘結。並該參佐領驍騎校。加具圖結。呈堂存案。其不及一石之米。除兵食餘米。為數無多。却竣後。方准鋪戶收買。除開銷運費外。其餘錢文。散給兵丁。或仍願兼領餘米。即令該兵丁將車腳等費交出。○四年

諭。嗣後各該旗都統副都統。每遇本固山應領餉銀等項日期。酌定一員。親身赴庫。並帶同章京暨認識銀色人役。會同管庫大臣等。監放監領。如該旗都統副

都統是日不到。即將兵餉暫行停放。俟各旗放竣。再由銀庫定期補放。其承領時如有短少。照例由庫補足。出具並無短少低潮甘結承領。仍由該庫逐袋散給印花。由承領官自行封口運回。未領以前。責成在庫。既領之後。責成在旗。不准互相推諉。○六年定八

旗兵丁關支甲米章程。每月開放甲米。定例於初三日放起。各旗滿洲都統等擇日先期知照各倉。領米之日。親身赴倉。眼同御史監督及參領等闡定廩座。登時開放。如一廩不敷。俟一廩放竣。再行另闡。其蒙古漢軍各都統亦擇日

前往關領。仍先期知照該倉遵辦。另將領米日期報部。至領米車輛。由各旗先期雇定。放米斗斛。由各倉先期傳集。臨時儻有不齊。即由該都統等分別叅辦。其三旗包衣健銳等三營。各由內務府大臣及該管大臣等。查照奏定章程一律辦理。一。闔廩開放後。儻米色低潮。攪合。即由該都統御史登時驗明叅辦。一。向來旗弁包攬領米。每句串鋪戶。囤集售買。嗣後應令都統等將該旗米石領出。督同參佐領等。押赴都統衙門。傳集各兵。按名散給。並取具參佐領委無私。

賣私折切結存案。嗣後開放甲米。以一倉一旗而論。滿蒙漢各限五日。一律放竣。如逾限不完。係旗弁領米遲延。由倉場侍郎等叅辦。係該倉開放遲延。由都統等叅辦。至滿漢春秋俸米開斛。按票放竣。均有定限。如有遲延。分別叅辦。一各倉存儲米麥豆石。統令查清管收。除在數目。及廩座開具清單。分別限日呈報。一向來割倉。係按例定次序。先陳後新。並須城內城外兼放。現在各倉存米。新陳無甚區別。且止城內七倉存米較多。嗣後止須倉存數放。即由部派劄。

毋庸由該司按次擬派。惟健銳三營甲米。坐派本裕倉。看守通倉兵丁甲米。坐派通倉。仍舊辦理。○七年

諭。嗣後紫禁城內上三旗護軍營。東西華門外大柵欄下五旗護軍營。東華門西華門神武門午門兩翼前鋒營。紫禁城看守朱車之內務府三旗護軍營。及三旗驍騎營。所有直班官兵。應領口分銀兩。均著加恩。按照舊章給發實銀。毋庸折扣。仍由廣儲司支領。所領米石。仍著照舊給發。其紫禁城外圍直班。向無口分之兩翼前鋒營。下五旗護軍營官兵。著一併添放。

口分。按照紫禁城內直班之例。發給實銀。由戶部支領。毋庸賞給米石。○光緒十一年。欽奉

慈禧端佑康頤昭豫莊誠皇太后懿旨。現在軍務較平。朝廷體恤臣僕。廩念時殷。加恩著將王公及在京官員俸銀。京師旗綠各營兵丁餉銀。並太監錢糧。自光緒十二年正月。起一律仍照舊制全數放給。至

陵寢盛京及各省官員兵丁減成俸餉。著俟庫款稍裕。由戶部奏明請旨。

旌表。○順治九年題准。八旗滿洲蒙古漢軍孝子順孫義夫節婦。由該管參領佐領覈實報明。都統

副都統咨送禮部具奏請旌。○又題准。

旌表節孝八旗滿洲蒙古漢軍支給戶部庫銀三十兩。令其自行建坊。○十二年題准。八旗滿洲蒙古漢軍凡應請旌之人。該旗於歲終彙送禮部具題請旌。○康熙三十七年。

諭興起教化。鼓舞品行。必以孝道為先。孝子尤宜褒獎。八旗貧人克盡孝道。誠為非易。如有盡孝於父母者。覈實奏聞。○五十一年題准。鑲紅旗有受聘未嫁之女。聞訃翦髮成服。敬守夫墓。守節三年。從容自縊。與尋常輕生者不同。照例。

旌表○五十六年

恩詔直省滿漢孝子順孫義夫節婦該管官細加諮訪
奏聞旌表以廣教化○雍正元年議准八旗分左右
翼各建二祠一為忠義孝弟祠一為節孝祠各
刊刻姓名於牌坊之上已故者設牌位於祠中
春秋二季致祭○四年鑲白旗有貞女未婚聞
婿病故自盡家人救醒至次日翦髮摘環哭往
婿家願終身守墓該旗都統具奏請旌奉

旨○如此貞節甚屬可嘉理應旌表○乾隆十一年議准
旗人已經開戶之節婦雖與現在戶下服役者

不同。究與良家有間。止許給建坊銀。其入節孝祠之處停止。○十二年奏准。外省駐防陣亡官兵一例入昭忠祠。○二十七年議准。八旗未婚貞女。三十歲以前守節。至五十歲完全節操者。該旗查覈實行。取具親族及該管官保結。送部彙題請旌。其有在夫家守節病故者。雖年例未符。其志可憫。該旗覈實報部。亦准題請。

旌表。○三十二年奏准。八旗滿洲舊習質樸。孝義之行。俱係分內之事。嗣後停止咨查。惟節孝貞烈婦女。仍照舊例行。其黑龍江所屬呼倫貝爾打

牲處之游牧打牲索倫巴爾虎達呼爾等。及伊
犁新設駐防等處。一應行查請旌之事。概行停
止。○四十二年奏准。正黃旗領催常在之未婚
繼妻。因伊夫病故。剪髮前往穿孝。現年五十二
歲。守節已二十八年。覈其情節。與青年矢志白
首完貞者無異。照例

旌表。○五十七年覆准。鑲藍旗滿洲陣亡議卹雲騎
尉長昌之妻。守節至五十歲。與請旌之例相符。
惟該氏因無子嗣。承襲雲騎尉。照例給食雲騎
尉半俸。與寒苦守節者有閒。未便給銀建坊。照

循分守節之例。給扁嘉獎。○嘉慶四年

諭。據保甯奏稱伊犁駐防滿洲錫伯綠營兵丁之孀婦。內守節已屆年限者。請照內地一體旌表等語。所奏甚是。中外之人。皆係朕世僕。理宜一體施恩。著即照所請行。但伊犁駐防索倫察哈爾額魯特回子部落人等。俱係牧處。其孀婦守節年限。未免難查。著仍從其舊。如此內果有如索倫孀婦伯克木庫終身守節者。亦應旌表。以示朕一體加恩各部落世僕之至意。

○六年議准。向例八旗節婦。年二十以內守節至四十歲以內身故者。不能同邀旌典。嗣後八

旗及各省駐防。如有此等守節之婦。年未四十身故者。覈其守節之期。已逾十五年。即一體咨部請旌。○同治五年

諭。正黃旗滿洲奏。貞女過門守節。請旨旌表。各一摺。甘肅候補直隸州知州毓鐘之子光祿寺筆帖式福全病故。其聘室原任刑部尚書成格之孫女。前任湖南衡州府知府英桂之女。聞訃後過門。矢志守節。深明大義。該部照例旌表。○七年議准。嗣後宗室滿漢為貞女請

旌。不拘常例年限。凡奉

特旨者一體

旌表○九年

諭。鑲白旗滿洲奏貞女過門守節請旨旌表一摺。戶部尚書寶鋆之姪候補筆帖式景曾病故。其聘室詹事府詹事紹祺之妹馬佳氏。聞訃後即行過門守節。立志堅貞。深明大義。著該部照例旌表。○光緒七年奏准。已故雲騎尉候選同知何泰來之未婚妻舒舒覺羅氏。夫故過門守節。照例

旌表。○十三年

諭。崑岡等奏丁憂工部左侍郎烏拉布之繼祖母岳

諾特氏。幼明大義。孝以事親。于歸後。因夫病。刲臂和藥。願以身代。夫沒無嗣。繼該侍郎為後。躬親督課。備極劬勞。計苦節五十年。現在該氏身故。援案懇請旌表等語。岳諾特氏著准其旌表。○又

諭翁同龢等奏請將已故儒臣列入國史孝友傳一摺。已故國子監司業治麟。至性過人。學行粹美。伊父景廉病篤時。該員竭力侍奉。積成羸疾。丁憂後哀痛過深。遂致沈疴不起。實屬天性純篤。孝行可風。治麟著准其列入國史孝友傳。以示旌獎。

出入符信。○順治十五年題准。旗人出關。該都

統咨兵部給票。採木人。工部咨兵部給票。○康熙十三年題准。文武官員帶有軍器出京者。係旗下人。該都統給予印文。若無印文。兵部不准給票。○五十一年覆准。山海關行走旗人甚多。侍衛官員前鋒護軍馬甲各執事人等。往

盛京。吉林。黑龍江等處。上墳探親。搬取家眷。恐有將誘賣之人買去。雜入役從內帶至彼處轉賣情事。嗣後八旗官兵及閒散人等。前往

盛京。吉林。黑龍江等處。所屬地方者。係侍衛。令領侍衛內大臣。係前鋒護軍。令前鋒護軍統領。係

驍騎校領催馬甲閒散人等。令都統副都統均逐一驗明。令其領取部票前往。如有將此等人隱漏多行夾帶者。令該管大員題叅交部治罪。

○雍正十一年

諭。嗣後凡夜間有應傳事件。著該管官員將所給差往之人用印傳帖。務令於次日繳回銷毀。儻若疏忽遺漏。一經查出。將該管官員嚴加議處。將此諭八旗內務府各部院知之。○乾隆五年奏准。八旗官兵有事告假往

盛京游牧地方及近京等處。係官該都統具結咨

兵部給以路引。係領催馬甲人等。由該佐領報參領給予關防印票。前鋒護軍各執事人。俱憑來文給票。閒散人給以圖記印票。票各註限期。與所往之地。均呈該都統存案。其告假往外省者。官兵均咨部給引。其引票回日繳銷。不繳銷引票及逾限不回者。鞭五十。不告假而私往或往非所指之地者。鞭一百。兵革退以上所犯係有職人。交部議處。○又議准。駐防旗人因考試襲爵承廕赴選省親等事來京。該管官取具本人三代年貌冊送該旗。再具印文並將年貌註

明給本人齋投。其外省隨任子弟有事來京者。大臣子弟該父兄具冊咨旗。餘官子弟該父兄冊呈該管上司轉咨。各具印文給本人齋投。並如前例。至來京事畢各仍回原處者。呈該旗行知該地方。具咨給本人齋呈該管官覈驗。如不候給咨私自來回。或領咨而往他處。並所司留難不給咨者。皆交部議處。○七年奏准旗人為地畝事及收租告假下屯。按道里遠近酌量給假。俾得從容料理。○八年奏准夜行傳事例用執照。嗣後務將月日註明。臨時給予傳事人。次

日繳銷。不得豫行給發。以滋假冒。如執照月日
不符者。拏究。並將給發之該管官議處。○道光
十三年

諭。嗣後奏事官接收奏章。著在九卿直班處接收。再接
封奏。務當逐件檢明。其聯銜封奏。及尋常摺奏。均著
各該衙門出具印片。交遞摺官員等隨摺交奏事官。
○十九年

諭。嗣後在京各衙門赴庫領取物料。著該堂官派委筆
帖式司務廳等官。帶領書吏赴庫憑文領取。並著於
領回物件時。進署當堂銷差。以絕弊混。○同治元年

奏准馬甲頂補患病之缺。佐領率行鈐用圖記。
並不詳查。亦未呈明甲喇報明印房。應分別送
部審辦。



欽定大清會典事例卷一千一百四十六

八旗都統

公式 禁令一

禁令○康熙四年題准旗人居前三門外者俱令遷入內城漢人投充旗下者不在此例○二十二年議定漢軍文武官員不論有無職任原在外城居住者准其居住滿洲蒙古告老告病人員有願住外城者准其居住○又議准官員無故出城過宿失誤朝期者革職如因埽墓醫病等事不及進城者罰俸一月○二十六年

論凡人之行。莫先於孝。近者漢軍居父母之喪。親朋聚會。演劇飲酒。呼盧鬪牌。儼如筵燕。毫無守制之體。至孝服拿縵等類。所用素色。皆異常華美。喪禮正當服用粗惡。豈宜華美耶。居喪演劇。滿洲所無。漢人亦未有。特漢軍為然耳。百行以孝為大。如此所行。以為孝道。其他又何足觀也。又漢軍外官赴任。每借京債。整飭行裝。務極奇觀。且多攜僕從。致債主抵任索逋。復謀贍僕從衣食。勢必苛斂於民。以資用度。且親朋債主疊往任所。請託需索。不可數計。是官雖一人。實數人為之。以致朘削小民。民何以堪。又漢軍外官不能

騎射。乃自稱行獵。多帶鷹犬。歇宿邨莊。滋害於民。禽獸本在山野。豈在邨莊耶。又漢軍服用。多僭越。非分。終日羣居。以馬弔飲酒為樂。此等物力。從何而出。有非苛取諸民者乎。漢軍習尚之惡。已至於極。如原任總兵諾邁。原任提督哈喇庫祖永烈等。於任所多買良民帶歸。原任總督張長庚。原任巡撫張德地。韓世琦等。皆貪婪虐民。居官甚劣。今著漢軍都統副都統等。凡有居喪演劇飲酒呼盧鬪牌者。照賭博例嚴行禁止。在外漢軍官員任所。有親朋債主前往請託需索貽累小民者。亦令察訪指名題參。朕此諭旨。專為

敦厚風俗陶淑人心而起。使漢軍居官者。皆似總督
范承勳巡撫于成龍之善。朕又何諭之有。○四十七
年

諭烏槍等火器。止當用於蒐獵行陣之間。此外一應旗
下民間不得擅用。著嚴行禁止。○六十一年

諭比見八旗官員兵丁內嗜酒沈湎。以致面貌改常。輕
生破產。肆行妄為者甚衆。其中豈乏才具可用之人。
朕實憫之惜之。著八旗都統各將該屬官兵內酗酒
不肖之徒。給限一年或二年。令其悛改者留之。如不
能改。係官員即行題參。應襲者令人承襲。係兵丁即

行革退。將本佐領閒散人內。揀選人材可用者充補食糧。既可以養其生。又可以得其力。如此凡嗜飲酗酒之徒。自知所懲戒矣。若禁止之後。仍然不改。一經查出。並將該管官員嚴行治罪。再著行文外省將軍副都統城守尉等一體嚴加約束。務令法在必行。○

又

諭下五旗諸王屬下人內。在京侍郎學士以上。外省州縣官以上。王等輒將其子弟挑為包衣佐領下官及執事人。任意虐使者甚多。嗣後著停止挑選。再現在行走人內。於伊父兄未任前挑選者。著照舊行走。伊

父兄已任後挑選者俱行查明撤回。若該王等特要挑選。著奏明再行挑選。○又定。喪家備禮。自宜量力。除能自備者照定例詳禮部備用外。其無力者止許賃棺軍執事等項。至租賃牽馬衣箱。徒滋糜費。且涉欺誑。應行禁止。○雍正元年

諭。凡旗員為外吏者。每為該旗都統參領各官所制。自司道以至州縣。於將選之時。必勒索重賄。方肯出結咨部。及得官後。復遣人往其任所。或稱平日受恩。勒令酬報。或稱家有婚喪等事。緩急求助。或以舊日私事要挾。至五旗諸王。不體下情。分外勒取。或縱管事

人肆意貪求。種種勒索。不可枚舉。以致該員竭蹶餽送。不能潔己自好。凡虧空公帑。罹罪罷黜者。多由於此。嗣後如有仍蹈前轍。恣意需索等弊。許該員據實封章密詳。督撫轉奏。督撫即據詳密奏。儘督撫瞻顧容隱。即許該員封章密揭。都察院轉為密奏。儘不為奏聞。即各御史亦得據揭密奏。務得通達下情。以除積弊。外任旗員。毋得隱忍畏懼。朕不治以干犯舉首之罪。○又

諭八旗各佐領下私行科斂。殊非善事。貧乏兵丁所恃以為生者。惟在錢糧。嗣後凡佐領下一應公中事務。

概不許私行科斂。若有不遵者。即以作弊治罪。○又

議准官民婚娶。止許照定例

詳禮部

行納采成婚。

禮。不許行插戴等禮。其財禮用金銀。婦輿用綵結樓亭者。悉令禁止。○又覆准兵丁每遇喜喪事。向富室借貸。令立文契。以七兩為十兩。或以二十兩為三十兩。將米充為利息。名為借銀。其實暗典兵米。嗣後以米為利。借給銀者。概不准還。如仍有借放之人。或經事發。將參領佐領驍騎校領催及借放中保人等。一併交部議處。○又議准八旗之人。居鄉者甚多。或大臣等子弟。

倚恃父兄之勢。希圖安逸。下鄉居住。此輩居鄉。率多不守本分。肆意妄為。應交八旗都統等詳查各該旗人。除五十歲以上。及年雖幼小。在京無所倚賴。與有廢疾之人。令在該旗具呈。聽其留鄉居住外。其年歲少壯。應在京居住者。無論係何人子弟。俱令查明調至京城。於伊等應行走處。令其效力行走。○又

諭。比見護軍等。仍然競尚服飾。朕閱兵丁。並不在於衣服。嗣後禁止兵丁等。毋得以服飾相爭尚。○又

諭。嗣後凡查富戶。將從外任丁憂及無罪致仕回京者。

永遠免其行查。如一併行查。徒令不肖都統參領等藉端取利。於事甚屬無益。且將伊等俱派富戶。則人如何能做好官。自降旨之後。若仍有詐索等情。定行治罪。○又

諭下五旗諸王將所屬旗分佐領下人挑取一切差役。遇有過失。輒行鎖禁籍沒家產。任意擾累。殊屬違例。

太祖

太宗時。將旗分佐領分與諸王。非包衣佐領可比。欲其撫循之。非令其擾累之也。嗣後仍照舊例。旗分人員止許用為護衛散騎郎典儀親軍校親軍。或諸王挑

取隨侍之人。或欲令所屬人內。在部院衙門及旗下行走者。兼管家務。或須用多人。以供差役。或補用王府官職。或令隨侍子姪。著開名請旨。將奉旨之處。知會該旗都統等。令都統等覆奏。其旗分人員。不許擅行治罪。必奏聞交部。如不請旨。斷不可也。儻有仍將旗分人員。妄行擾累。令其多供差役。兼管散職。著該旗都統等奏聞。若都統等隱匿瞻徇。一經御史叅劾。即將該都統等治罪。○又奏准。不肖兵丁。將軍器質當。應行嚴禁。嗣後有將盔甲。撒袋。腰刀。鳥槍等物質當者。本人及開當舖之人。一併嚴加治罪。

其該管佐領驍騎校等。交該部議處。○又奏准。凡外任及監管稅務官員。除平常借貸銀兩外。有以六七百兩為千兩。勒取三分四分重利者。該旗參領佐領驍騎校等不得具保。僅有私行潛保之人。查出交部治罪。其遣人往任所取私債者。令地方官查拏解部治罪。○又議准。不肖之徒。至每年十月間。開闢雞鵲之場。借以網利。兵丁人內有溺於其戲者。往往規避官差。結附匪人。典衣棄產。以償負欠。其貽害兵丁。更甚於賭博。嗣後將開闢雞鵲場及闢蟋蟀之處。

一併嚴行禁止。儻有犯者。立行緝捕。交部照賭博例治罪。其該管官員。亦照管轄賭博不嚴例議處。○二年覆准。不肖之領催驍騎校等。於該佐領下借放私債。名曰印子銀。每月坐扣兵餉。嗣後除兵丁等自相借貸不禁外。其佐領等借放印子銀坐扣兵餉之習。概行禁止。每月關支兵餉。令佐領驍騎校親身驗放。並飭各該參領稽察。如有犯者。將失察之參領等。一併議處。○又奏。八旗兵丁聚飲園館者。責革。係官叅劾治罪。奉

旨。著八旗都統等照依所奏。實心奉行。不時稽察教訓。若視為具文。苟且塞責。經朕查出。將該都統等從重治罪。○又

諭。嗣後遇毆斃家人事件。詳其情罪。分作三等。定例議奏。刑法者上關

天和。下係民命。實為治之要也。朕御極以來。讞斷必加詳慎。務期當罪而得其平。惟明克允。所以體

天心而重民生也。向來八旗官軍人等。待家人過嚴。微小之失。必加毆責。甚至傷體斃命。以致奴僕畏懼。逃遁者頗多。奴僕至於背主而逃。即緝拏追獲。亦難信

任使令。夫奴僕雖賤。彼亦人子。況性命攸關。何得任意荼毒。致其無容身之地耶。朕於刑部成獄。除強盜故殺謀殺等犯。不得不依律正法。其餘罪犯。略有可恕者。俱行寬免。從未降旨特殺一人。朕大君也。於有罪者。尚不忍輕殺一人。臣下乃可毆死無辜之奴僕乎。且奴僕奔走服役。勞苦殊甚。兼其質本愚昧。易獲過愆。全賴上之人矜恤原宥。即有酗酒為非之人。雖應加懲治。亦不宜過重。致於死地。以逞一時之憤暴。該部即行文曉諭八旗。嗣後務宜待下以寬。不得擅自毆死家人。以副朕仁愛生人至意。○又

諭朕以八旗滿洲等生計。時廛於懷。疊沛恩施。其妄行
過費。飲酒賭博於歌場戲館。以覓醉飽等事。屢經降
旨訓誡。即諸臣條奏所請應行禁止之處。亦已施行。
令其禁止。凡朕所降諭旨。及各項禁約。務須將其利
弊詳行剖析。明白書寫。於旗下每佐領各頒一張。嚴
示衆人。各都統亦宜時加訓誡。謂主上廛念八旗滿
洲等生計。種種恩施。不一而足。各宜安分謹守儉樸
之道。力改妄費賭博醉飽於園館等事。洗滌惡習。求
副主上降旨訓諭仁愛之至意。儻不實心感戴。不學
為善。不遵法度。必且一生徒自暴棄。不但終於下賤。

且無益於生計。而有害於其身。任主上作何恩施。何益之有。況主上頻勞心慮。諄諄訓飭者。係為誰哉。爾等誠宜省悟。日夜仰戴。歡然遵行。凡滿洲儉樸之道。及清語騎射。當差行走。操演技藝。嫻習禮儀等事。皆當盡心努力學之。或有不改前愆。不遵法度之人。一經查出。務必從重治罪。以儆衆人。並將此語書寫。不時傳示稽察。始為有益。不然。但於朕降旨時。暫申禁令。久而遂輟。亦何益哉。將此傳諭八旗都統等知之。

○三年

諭大臣等之家人。互相黨比。結為兄弟。鑽營請託之處。

甚多。大臣等彼此和洽。其請託固不待言。如彼此不睦。家人從中或為調停。或為激怒。千態萬狀。各欺其主。以圖己利。伊主為其所惑。不能辨別是非。反為家人所用。而忘己之利害。大臣等誰無任使之人。往往聽信家人之言行事。獲罪敗名。不可勝數。此朕數年來所深知。亦衆所共知也。此等事大有關係。不可不嚴行禁止。著交與步軍統領五城官員。凡大臣等之家人。如有嫁娶筵席延請親友等事。令各稟明家主。然後舉行。儻有私結黨與。約為兄弟。彼此會飲。請託事件者。即行嚴拏具奏。朕必重治其罪。再諸大臣之

妻互相延請燕會。為樗蒲之戲。借此夤緣。請託大臣。中現有為伊妻所制。凡事依允者。甚屬可恥。大臣等宜加防範。苟以此為小事。漫不加禁。遂致敗名獲罪。慚愧豈有大於此者。且國家大臣。若不能約束妻奴。如何辦理國家之事。將此通行八旗。曉諭諸大臣。各宜加意嚴行約束。○又奏准。城內向來禁放鳥槍。歷年既久。禁令漸弛。應令步軍統領將城內放鳥槍。並非時放爆竹之處。永行禁止。○又奏准。教場乃緊要之地。又係近城風水攸關。嗣後令步軍統領衙門出示曉諭。嚴禁掘土。仍交稽察。教

場旗員該營武弁及兵馬司官員令其不時巡查。若仍有在教場處掘土者。即行拏送刑部從重治罪。將該管官一併議處。○又議准八旗教場俱近城垣。不肖人等希圖取利。掘土為坯市賣。應由步軍統領衙門八旗稽察教場官員及五城兵馬司官員嚴行禁止。○四年

諭滿洲本性原以高樸儉約為尚。今漸染漢人習俗。互相仿效。致諸凡用度。皆涉侈靡。不識搏節之道。罔顧生計。因酌定品次。禁止服色。勒限一年。令其各按品次服用。降有諭旨。甚為明悉。此特軫念八旗滿洲官

兵如同保赤。關繫尤切。故曲為籌畫。定其品次。以禁服色。欲令其日用充足。非無故而禁止也。或有無知之徒。猥稱民人奴僕。且並不止。聽其任意服用。何以禁止我輩等語。又不識朕矜恤之意。於禁止限內。製作新衣。誑稱是禁前所製。若儘教如此製用。終無底止時矣。夫民人奴僕。有何關繫。安得與官兵比並。即使伊等衣服華美。豈遂較官兵榮顯乎。須知並非為官兵等不及若輩。爰有是禁。亦為官兵等之生計。而禁止耳。人之尊榮。不在衣服。惟在各人行止。蓋富足之人少。而家本貧乏。互相仿效之人多。既已貧乏。

而又勉強仿效。則至生計愈窘矣。衆人與其如此。拮据於衣服。豈若安守本分。砥礪於學藝品行。果能奮發黽勉。得歷官階。以至大僚。自然得服用矣。凡官員兵丁。所恃以爲生者。惟在俸餉。且各有應當之差。若因製衣服。即耗費數月之錢糧。其日用尚能饒裕乎。夫儉約爲持家根本。不能節省於衣服等項。焉能有益於生理。若能謹遵朕之諭旨。儉約自持。不事奢靡。濫用。至比戶漸臻充盈之時。方感戴朕教養之深恩矣。著交與各該管處。再行曉諭八旗滿洲蒙古漢軍內務府佐領官兵等。務使咸知朕心。各求儉約。以副

朕矜恤優待旗人之至意。○又

諭賭博之事。最壞人之品行。若下等之人習此。必至聚集匪類。作姦犯科。放僻邪侈之事。多由此起。若讀書居官之人。習此。必至廢時失事。志氣昏濁。何能立品上進。乃向來屢申禁飭。而此風尚未止息。深可痛恨。若不嚴禁賭具。究不能除賭博之源。著京城內外及各省地方官。將紙牌骰子。悉行嚴禁。不許貨賣。違者重治其罪。常有窩賭之家。誘人入局。以取其利。嗣後准輸錢之人。自行出首。免其賭博之罪。仍追所輸之銀錢還與之。庶使賭博之人。有害而無利。則其風可

以止息矣。又見漢軍惡習。常以工於馬吊互相誇尚。且借此為消閒解悶之具。夫既已居官。則應辦之事務甚多。日夕不遑。尚恐遲誤。安有餘閒。為此無益之戲。且聞有上司與屬下官員鬪牌為戲者。尤非體統。大玷官箴。嗣後有官員鬪牌賭博。著該管上司及該督撫指名題參。○又

諭。八旗兵丁在城外營房居住者。其管轄兵丁之長。各旗應嚴行傳示伊等。各與旗人相居一處。如兵丁內有作惡妄行偷盜劫奪之匪類。豈有不知覺者。理宜將此等人不時稽察。嚴加約束。如不嚴查禁止。儻遇

偷盜劫奪等事發覺之時。必將營房之長一併重處。將此交八旗都統等。各於本旗徧行嚴示。○五年

諭。從前屢降諭旨。令文武大臣各將家人嚴行約束。無得聽其朋謀結黨串通生事。反覆訓誡。至再至三。無如漸染既久。積習尚未盡除。凡屬旗人。一入大臣之列。即有一出名之管家。內外傳播。諸大臣之管家。即於同類中輾轉糾合。彼此相邀。飲酒唱戲。結黨營私。各將主人百般引誘。黨與之結。大概多由此起。入伊等之黨者。則於伊主之前。將入伊黨之主人稱揚贊美。令其主人亦互相交好成黨。不入伊等之黨者。則

於伊主之前。將非伊黨之主人。離間陷害。令其主人亦互相傾軋成讎。夫家主果念家僕出力。欲加撫育之恩。亦止宜於家門之內。加意思養。何必縱容結成黨與。以伊等之好惡為從違乎。如此則大臣等非驅使奴僕。直為奴僕輩所驅使耳。況縱僕在外招搖生事。實為可恥。何得轉以為榮。及至劣蹟敗露。爾等為其所累。誠何苦乃爾耶。家僕結黨。雖屬細事。此風關繫匪輕。嗣後文武大臣等。嚴行約束家僕。實力稽查。務使各安本分。毋得縱容結黨。僕仍前玩忽不加嚴禁。致復有結黨生事妄為者。經朕聞知。必將此等惡

僕即行正法。著通行傳諭八旗。以及內務府佐領。咸使知之。○又

諭聞夜間行走之人。手執一紙。口稱傳事。即許其行走。如此則不肖之徒。詐為蒙混。亦未可定。著即傳諭八旗都統大臣。若有夜間傳喚之事。或用印文。或用參領佐領鈐記關防。方許行走。如無憑據。即以犯夜拏問治罪。將此徧行曉諭。斷不可輕易放過。如此則夜行之人。自然禁止矣。○又

諭自古人生以節儉為本。蓋節儉則不至於困窮。糜費則必至於凍餒。此理所必然者也。本朝滿洲素性淳

樸。凡遇出兵行圍。俱係自備。並無違誤。而生計各足。近來滿洲等不善謀生。惟恃主上錢糧度日。不知節儉。妄事奢靡。朕將滿洲等生計時。廩於懷。從前屢曾降旨諄諄訓諭。但兵丁等相染成風。仍未改其糜費之習。看來滿洲等不知節儉。多有以口腹之故而鬻賣房產者。即如兵丁等每飯必欲食肉。市肉一斤。其價可抵數日之蔬食。以貴價市肉而食。則一月所得錢糧。不過多食肉數次。即行罄盡矣。且口腹有何饜足。其每日食肉之人。猪肉既饜。必更思別味。如此每月不計出入。隨得隨費。以致失其生計。且又將每季

米石。不思存貯備用。但圖數日之肉食。違背禁令。以賤價盡行糶賣。沽酒市肉飲食。至於無餘。則闔家匱乏。彼時欲食無糧。欲服無衣。凍餒交迫。仍自誇張。謂我從前曾食美物。曾服鮮衣。並不悔悟。所以致此困窮者。乃以美食鮮衣之故也。况飲食俱由習慣而成。縱食美物。不過一飽而已。其他並無善處也。現今肉價每斤值錢百文。而貧困之人。仍復勉強買食。若使衆人稍知儉約。不每日買食。則肉價自平。可以賤價而得。且兵丁等豈能每日皆得美食。至食空飯之時。不能下嚥。必又不免於嘔噁咨嗟。夫以

上天所賜之飯。乃不欣然食之。反以無肉為怨。必致孽及其身。而減其福祿。今漢人謀生。尚知節儉。雖殷實之家。而每日肉食者甚少。其貧乏之人。逐日謀食。僅堪餬口。若滿洲等。果能節儉。各顧其分。節於肉食。每飯惟用蔬菜。將每月所得錢糧。少使留餘。則日久習成。生計自裕。產業可立矣。或有不肖之輩。不守本分。妄行糜費。既至貧乏。惟希恩賞。從前

皇考之時。軫念兵丁。效力行閒。致有債負。曾發帑金五百四十一萬五千餘兩。一家獲賞。俱至數百。如此賞賚。未聞兵丁等。置有產業。生計有益者。悉由妄用於

衣食。徒令貿易之人得利。一二年間。蕩然無餘。心愈奢侈。而生計較。前反加窘乏。其後又發帑金六百五十萬四千餘兩。賞賜兵丁人等。亦如從前立時費盡。朕自即位以來。除特行賞賜外。賞給兵丁一月錢糧者數次。每次所賞。需銀三十五六萬兩。此銀一入兵丁之手。亦不過妄用於飲食。不及十日。悉成烏有。亦何裨益。且庫帑俱係國家之正項。天下百姓之脂膏。豈可無故濫行賞賚。以累百萬之帑項。徒供伊等數日口腹之費乎。若不將滿洲等不論多寡。隨得隨盡之惡習。令其改除。朕即有施恩之意。亦不可舉行。

兵丁等果將朕訓諭之意。曉然明晰。實心遵行。痛改妄行糜費之習。咸各崇尚滿洲儉約之風。節用以謀生。則生計自遂。朕加恩賞賜。衆亦可得永遠均沾。優然樂業矣。若邀

天眷佑。衆皆勉遵朕諭。感戴歡欣。常加淬勵。至生計各遂之時。始知朕所以愛養滿洲之恩。為至深且切也。至於人之榮辱。俱係於行止。並不在於衣服飲食。乃習俗既侈。人不以妄用過費者為非。反以節儉謀生者為鄙吝。而譏誚之。斯皆由平時之惡習既成。以至難於更改也。今使衆人如夢初覺。如醉初醒。惕然省

悟。將此越分妄費之人。衆人皆鄙薄之。則奢侈者亦必自止矣。即王大臣等亦宜各從儉約。以為下人之表率。蓋在上該管之人如此行之。則在下兵下人等必皆效法。知改。即一時不能盡改。而彼此交相勸勉。行之既久。自可挽此惡習。兵丁等果能各知儉約。節用錢糧。豫計將來。思立產業。則風俗漸成。而生計饒裕。不至有困窮之憂矣。朕視滿洲最為關切。乃國家之根本。非其他可比。朕知之既深。豈有不教之理。且朕自即位以來。衆人有論朕為太嚴者。斯亦由朕欲衆人痛改惡習。進於善良。止其奢靡。使知儉約。教育

衆人俾得生計。凡朕意慮所及之處。悉申禁令。而不肖匪類。不得肆行其意。故妄加議論。即如朕曾降旨禁止飲酒。酒者甚非善物。飲之過多。則能亂性。因醉後鬪毆而遭罪譴者。往往有之。酗酒之惡。無人不知。將此禁止。可以謂之嚴乎。又曾降旨禁止賭博。因賭博而破產者。非止一人。從未聞有以賭博致富者。即使賭博能勝。其損人利己之物。亦斷無滋益之理。且例有治罪之條。此欲使衆人不失生計。不干罪譴而禁之也。又可謂之嚴乎。又曾降旨禁赴園館行走。奢侈之人。延請賓客。往赴園館一次。即費數金。兵丁人

等有何產業。如此過費。何所持以為生。若惜此銀兩。以養妻孥。足支一二月之用。此特欲止其妄費。以裕其生計而禁之也。又可謂之嚴乎。又曾降旨禁止鬪雞鵒鶉蟋蟀之戲。此等皆係無用之物。一耽此戲。則荒廢正務。徒費心思。雖家道殷實閒散之人。亦應學習文武技藝。若耽於此戲。以身為鬪雞鵒鶉等物所役使。有何裨益。以此戲為賭具。致有破壞家產者。其害更甚於賭博。此特欲滿洲等罷無益之戲。習於為善而禁之也。又可謂之嚴乎。又曾降旨禁止訛詐盜竊者。夫訛詐盜竊之事。良善之人斷不肯為。俱係妄

亂之輩所行之事。此特欲使惡人知儆良善獲安而禁之。又可謂之嚴乎。又曾降旨禁雇人當差。兵丁人等身既為兵。領受錢糧。則當差行走。習學勞苦。俱伊等分所當然。理宜遇事向前。勉力當差。諸事習練。乃有不肖之徒。安於懶惰。將銀雇人代為服役。致誤差使。罹於罪戾。習成懶惰。耗費錢糧。毫無裨益之處。將此禁止。又可謂之嚴乎。又曾降旨禁止兵丁不許妄行賣米。給予兵丁人等米石者。原欲其養贍一家老幼也。乃有不肖兵丁。但思食用貴價好物。將所得米石賤價糶賣。以至下月即有缺米者。此特欲使旗人

舉家不至乏食而禁之也。又可謂之嚴乎。又曾降旨禁止放印子銀兩坐扣錢糧。此等借放印子銀兩之人。既經借給兵丁。將每月錢糧盡行坐扣。一任兵丁之家。有何急務。並不一月放寬。徒令放銀之惡棍得計。於兵丁毫無益處。此禁止放印子銀兩。特欲使兵丁人等得其利益也。又可謂之嚴乎。又曾降旨禁典錢糧米石。夫錢糧米石。係兵丁終歲所恃以為生者。乃有不肖之人。賭博妄費。以致拖欠債負。無力償還。將錢糧米石。賤價典當與人。若行禁止。則兵丁每季得米。每月得銀。足以養贍其妻子。此特欲使滿洲等

不至於飢寒而禁之也。又可謂之嚴乎。又曾降旨禁令喜喪等事不許妄費。衣服各按品級。夫貴賤有等。服用有制。越分服用。不徒無益。而家產亦盡耗於無用之地。如奢侈者既經禁止。則守分者自不強相效仿。此特欲衆人罷糜費之習。俾生計從容而禁之也。又可謂之嚴乎。又曾降旨禁用黃銅器皿。夫制錢乃係國寶。因其價昂。於衆無益。故行禁止。今錢價既平。衆人皆獲利益。此特欲使兵丁用銀兌錢。可以多得而禁之也。又可謂之嚴乎。又曾降旨禁止因公科派夫兵丁人等。惟恃每月所得錢糧養贍妻子。乃有無

恥之該管官員。假託公事科斂錢糧。則兵丁必受其累。此特欲使兵丁等皆得全分錢糧而禁之也。又可謂之嚴乎。又曾降旨禁止鑽營請託。夫請託鑽營之事。必致背理犯法。不惟是非顛倒。而不肖之人。不過倣幸於一時。亦終不能免於罪戾。此特欲剔除弊端。使諸事就理而禁之也。又可謂之嚴乎。又曾降旨禁止臣工不可貪黷。蓋官員既肆其貪婪。則下人必至於窮蹙。豈惟有玷官箴。亦且干冒國法。如臣工果皆廉潔。則所屬多獲其益。此特欲使各守官箴而禁之也。又可謂之嚴乎。又曾降旨禁止要結朋黨。夫結黨

之人。乃國家之亂臣賊子。若不嚴加禁止。一經事發。必致多所殺戮。若衆人知懼。果能悛改。非惟可保其身。亦得全其家產。此特曉諭衆人。使罷朋黨之習。以免於誅戮而禁之也。又可謂之嚴乎。凡係朕所禁止諸事。悉為兵丁等身家計也。此內何事不宜禁止。於朕躬有何關礙之處。乃衆人雖生怨論。而猶如此諄諄訓誨不已。衆人咸應體朕苦衷。何得更有怨言。此皆係不肖妄亂之人。不得肆行其意。妄謂法令過嚴耳。其守分畏法方正之人。法令雖嚴。於伊何礙。且凡此禁止之條。咸係

皇考從前禁止之事。並非創始於朕。但當時之臣工。未能實意奉行。開導訓諭所屬之人。是以一應惡習。未得盡改。今朕特為兵丁生計。不時令王大臣等教以節儉。禁其奢靡。訓誡諄諄。而王大臣官員內。仰體朕旨。加意奉行者。不過十居其五。其餘大半尚未愜朕懷。而無知之人。遂論以為過嚴。設使大臣等咸各遵照朕旨。竭力嚴加訓飭。則姦惡之徒。又不知作何妄論矣。如欲使若輩稱為寬仁之主。何難之有。但不加管教。任其酗酒賭博。出入園館。以及種種糜費妄亂之事。俱令得行。則若輩必稱朕為寬仁之主矣。然此

不但朕不能遂其不肖之念。如坐視滿洲等漸流至
於不得衣食。毫無顏面之時。即以國家全力養贍伊
等。亦且不能給足。朕意實有所不忍。勢亦必不可也。
朕今因兵丁食肉之故。降旨訓誡。想無知之徒。必又
云。既已禁止我等不穿紗帛。不飲酒醴。不入園館。不
用銅器。不賣米石。今又禁至於食肉矣。如此妄言者。
勢所必有。然朕亦笑而聽之耳。要不過頑劣無知之
人。肆行怨謗。若稍有知識者。必以朕廑念伊等生計。
訓諭至於飲食微細之事。而生感也。斷不再有怨言。
在此等無知愚昧之言。與孩童怨其父師管教之嚴。

相類。及至成人為官之時。始知父師嚴加教育之恩也。今豈有因一二愚蒙妄論之故。朕即不加教訓。聽其底於窘迫之理乎。即此等奢靡頑劣之徒。雖懷怨望之念。今見朕為伊等生計。再三開導訓諭。僅能反復思之。亦可回其不肖之心。而進於良善。爾等其仰副朕廑念滿洲等生計之至意。各將所屬官兵及閒散人等。剖析情理。不時詳加訓誡。特諭。○七年

諭聞盛京之部屬旗員兵丁等。每遇升轉遷移及喜慶等事。均攢集分金。彼此餽送。而無力之微員及兵丁人等。亦不得不勉強從事。往往日用不敷。而此例不

能廢。禮云貧者不以貨財為禮。盛京此等陋習。皆由於生事結納之人。偶倡率於先。遂致相沿成習。莫知省改。此亦風俗之所當禁約者。著該管各官通行曉諭。嗣後除吉凶大禮。本人情誼敦篤。情願自行餽送外。僅遇尋常升轉喜慶之事。不許攢集分金。務虛文而耗實用。如或不遵。該管官查出。將本人及為首邀約者。一併照例懲治。○八年奏准。八旗遇婚喪事。若有違例僭用者。該佐領族長呈報都統。送刑部治罪。若有徇隱。該佐領族長交兵部議處。奉

旨。著該旗都統查旗御史參領侍衛及步軍統領一同

稽察。果有違例僭越者。即行叅奏。若該旗都統查旗御史參領侍衛步軍統領有一處查出具奏。餘皆免其議處。若經他處查出。將該旗都統查旗御史參領侍衛步軍統領等一併議處。○九年議准。八旗瘋病之人。其親屬人等即報該佐領。令其親屬鎖錮看守。如無親屬。即交族長人等如法看守。如親屬族長隱匿不報。不行看守。或已報而佐領不飭令親屬人等看守。致病人自殺。或殺他人者。該佐領議處。親屬族長按律治罪。○十年議准。商民人等。除在

東安門

西安門內路傍支繖作書場茶社者。毋庸禁止外。其玉河橋以東。團殿白塔等處。街道既狹。且於紫禁城相近。應嚴行禁約。再城內居民。凡作道場。其有力之家。各於院內自設經棚。大門復立鼓吹棚。去道稍遠。例應不禁。其房屋臨街。院落狹小。半係無力之家。不應作過費之舉。止應准其於門外貼近。暫搭席棚。以為親朋坐立之所。若於道上搭棚。揚旛挂榜。實非所宜。應行禁止。至於謝神打醮。各有寺廟。當道搭棚。尤屬不可。亦

應一併嚴禁。○十一年

諭從來造作言語煽惑人心者。律有不赦之條。若在軍前造言傳播。其罪更重。俱照軍法即正典刑。此自古相傳之憲典也。數年以來。西北兩路用兵。征討準噶爾。該管大臣官員等。居心急忽。辦事粗疏。號令不嚴。稽察不密。聞有不肖之人。在軍營各處捏造全無影響之談。或稱京師有某新聞。或稱某營有某近事。一人先倡。衆口附和。而愚昧之人。不能辨別。遂信以為實。彼該管大臣官員等。雖心知其非。往往難以根究。希圖省事。置之不問。遂致不肖之徒。信口流傳。全無

忌憚。又有從軍營回來之人。造作言語。以惑亂在京之聽聞。如此等事。不但有妨於公務。亦且大害於人心。不得不嚴加禁約。著行文各路將軍。令其詳細曉諭該管弁兵及跟役買賣人等。嗣後儘有造作浮言者。必將為首之人究出姓名奏聞。請旨即於本處正法示衆。其失於覺察之該管官弁一併治罪。若能查出叅奏。免其議處。至在京造言生事之人。交與步軍統領八旗都統都察院五城御史順天府先期曉諭。儻怙惡不悛。即行查拏從重治罪。○十二年

諭古之葬者。厚衣之以薪。葬之中野。後世聖人易之以

棺槨。所以變通宜民而達其仁孝之心也。本朝肇迹關東。以師兵為營衛。遷徙靡常。遇父母之喪。棄之不忍。攜之不能。故用火化。以便隨身奉持。聊以遂其不忍相離之願。非得已也。自定鼎以來。八旗蒙古。各有寧居。祖宗墟墓。悉隸鄉土。喪葬可依古以盡禮。而流俗不察。或仍用火化者。狃於沿習之舊。不思當年所以不得已之故也。朕思人子事親。送死最為大事。豈可不因時定制。痛自猛省乎。嗣後如遠鄉貧人。不能扶柩回里。不得已攜骨歸葬者。姑聽不禁外。其餘一概不許火化。儻有犯者。按律治罪。族長及佐領等隱

匿不報一併處分。○又議准八旗舊教場居住兵丁。在各處當差行走。是以該管教場之章京驍騎校等。不能徧行稽查。每有成羣聚飲賭博等習。且教場內多有漢人租賃房屋開設酒鋪。貨賣食物者。於兵丁生計。大有不便。應於現管舊教場之滿洲蒙古二旗護軍校驍騎校七員內。派滿洲蒙古二旗大臣會同揀選一員。委署章京。協同正章京管理。仍於每街居住人內。擇其能管約者二人。一作正街長。一作副街長。即令查管飲酒妄為之人。凡係肩挑及開設鋪面貨賣。

食物者照常准其貿易外止將賣酒者嚴行禁止如約束得法於應升之處列名如不嚴行查管仍有賭博飲酒等事即交部查議仍於舊教場之兵丁內特派十名每日隨章京街長等在教場內查拏飲酒賭博之人其所派章京首領兵丁實心稽查者議敘鼓勵其不實心巡查者懲治議罪作為定例

[illegible]